



册府元龟
卷之九十
至二



1 3
849
33



門 1 3
849
33



册府元龜

淮南李嗣京叅閱

再極文翔鳳訂正

豫章黃國琦較釋

帝王部 九十一

赦宥第九

唐穆宗以元和十五年正月卽位二月丁丑御丹鳳樓大赦天下制曰著大明者日也出乎震而見乎離則八絃開朗萬象昭煥乎大號者風也發厚地如鼓羣動則氛蒙盪滌鬱伏舒散王者如日之炤臨故聖

躬作而庶類覩如風之號令故德音降而非人從朕以寡薄方茲嗣服荷天地之眷祐承宗祧之祚運夙夜祗厲懼不克周永惟風教之流弊吐俗之疾苦思布濟時之政宜弘利物之澤庶有以導迓和氣感致懽心宜申在宥之恩用啓自新之路可大赦天下自元和十五年二月五日昧爽已前大辟罪已下罪無輕重咸赦除之唯官典犯賊及故殺人者不在免限左降官量移近處已經量移者更與量移如復資者卽任依嘗調選責授降資正員官者亦與進改亡官失爵不齒者量加收敘流人及僧尼道士移隸者節

敘放還及移近處諸色得罪人中如先有勅去縱盜恩赦在放還之限者亦並與量移若曾任五品已上官者奏待進止左降官及流人先有官者如亡歿各還本官自今日已前曾有痕累禁錮等一切竝與洗滌未惟罔極弓劍不留號奉終天用深哀感應緣山陵制度喪儀禮物宜委中書門下及諸司長官等博詢故實務遵禮度必誠必信副朕哀懷所緣山陵造作及橋道置頓並以内庫錢克不得輒令科配百姓度支諸州府監院從貞元八年已後至元和十年已前其記欠錢一百一萬五千九百餘貫鹽鉄使諸監

院應欠元和十三年已前錢物除准前制踈理外其欠一百八萬八千六百餘貫石等戶部諸州府從建中三年以後至元和十三年已前應欠在州貧窳并遭水旱逃亡百姓腹內兼連接淮南賊界并燒劫散去及賑貸百姓錢物五十萬九百餘貫石等京兆府從元和五年已後至三十年已前欠諸色錢物共四十一萬九千五百餘貫石東等州府監院百姓欠負但在官典所由腹內者一切放免諸州府除京兆河南府外應有官莊宅舖店碾磑菜園鹽畦車坊等宜割屬所管官府諸道除邊軍營田處其軍銀既取

其正稅米分給其所管田自爲軍中費用不合取百姓營田并以瘠薄地廻授百姓濃肥地其軍中如要營田任取食糧健兒不得輒妄招召天下百姓等自屬艱難棄其鄉井戶部版籍虛繫姓名建中元年已來改革舊制悉歸兩稅法久則弊奸濫益生自今已後宜准例三年一定兩稅非論土著客居但據資產差率其擇刺史縣令宜委門下中書省御史臺官有所諳知卽具聞薦如贓污殘人當坐舉主權稅之法雖合同遵瘡痍之餘始欲寬假其河北稅鹽宜委度支與權鹽使審細商量具條疏聞奏內外百官食利

錢一倍至五倍已上節級放免仍每經十年卽內外
百司各賜錢一萬貫克本各據司大小公事閑劇及
當司貧富作等級付應屬諸軍諸使諸司人等在村
鄉及坊市舖店經紀者宜與百姓一例差科不得妄
有影占如有違越所司具屬司并人名奏聞如聞度
支鹽鐵院等所在影占富商高戶庇人院司不伏州
縣差科疲人徧苦事轉不濟如有此色仰當日勒歸
諸州縣道除正勅率稅外不得妄託進奉擅有諸色
推率天下州府除兩稅合送上都錢物乃所繇嘗貢
外輒不得別進錢物并方鎮得替後至城亦不得輒

有進獻掖庭籍沒罪人妻子等宜並放歸親族其諸
軍先擒吐蕃生口配在諸處者並放歸國願住者亦
聽内外文武見任及致仕官三品以上賜爵一級四
品以下加一階諸道諸軍將士等普恩之外賜階爵
有差二王三恪文宣王及公主縣主嗣王節級賜與
二子官及出身宗子才行者委以名聞奏仍委中書
門下量才叙用皇王等已上親皇太后二等已上親
並賜階爵武德已來配饗及第一等功臣并張巡許
遠南霽雲顏真卿杲卿等尚父子儀贈大尉秀實子
孫中與一子官有差其中有才行堪任臺省者量才

叙用中書門下並諸道節度使諸州府長官東都留守及京嘗叅官諸軍使等父母祖父母並節級與追贈父母存者與官封已經追贈更與改贈興元奉天功臣及蔡邨立功將士普恩之外更賜勳爵亡歿者與追贈中書門下及節度等使東都留守度支鹽鐵使京兆尹諸州刺史等賜一子官有差在城諸軍將士節級賞賜仍加階爵京西京北及振武天德八道節給都防禦使下及神策一十二鎮將士等共一十八萬六千七百餘人都賜物一百八萬一千八百餘疋東宮官及侍讀普恩之外賜爵加階仍普與進改

自國哀及行事命職事官普恩之外賜階爵及勳其受顧命撰制誥及冊文并寫制誥官等特加一階賜爵一級並賜上柱國優與進改書冊官特加一階尊親之禮卽展於徽章廣愛之恩宜申其慶賜皇太后諸委中書門下量第等節級優賞文武嘗叅官及外官職事五品已上有母者並加邑號如已至郡太夫人者許回授周親應緣皇太后冊禮職事官並節級賜天下百姓父母祖父母年高者賜粟帛城內蕃客等並節級賜今年正月二十八日至閏正月二日宮苑諸門守捉西內立仗將士等量加改轉應內侍省

及內防宮正等並賜勳爵嘗叅官及諸州刺史少尹
亦令有先得替及因病假滿百日解官并終制未授
官者及致仕官並與進擬天下諸道州不得擅有關
羅禁錢務令通濟内外文武官及諸色人中任上封
事極言時政得失才有可觀別當甄獎應外色役等
賜勳有差

十一月制王承元首陳章疏願赴闕廷宜令諫議大
夫徃鎮州宣慰王澤所洽天網方恢宥過釋寃與人
休泰其管內見禁囚徒罪無輕重並宜赦免

長慶元年正月辛丑郊禮禮畢御丹鳳樓大赦改元
制曰朕聞自昔盛王之所以合天地諧神人莫過乎
誠致其誠展其敬莫重於祭祭之大者莫大於郊廟
故必躬行而心奉之然後百靈助慶萬國蒙福此帝
王之孝也我國家祖功宗德立號配天日月所炤雨
露咸被孝思善繼聖敬允升郊丘歲奉於嚴禋宗廟時
修其明薦朕以冲昧自獲纘承仰荷瞻命懼不克享
幸天多祐俾歲大穰河朔底寧邊封靖謐及此元日
至於上辛式遵典禮有事郊廟當祇見之夕感慕增
懷洎大報之辰誠敬彌勵因體元而紀號用敷化之
覃恩可大赦天下改元和十六年爲長慶元年自正

月三日昧爽已前大辟罪已下罪無輕重咸赦除之
唯故殺人者十惡內者及官典犯賊不在免限左降
官量移近處如復資使任選亡官失爵不齒者量加
收叙左降官及流人先有官者如已亡歿者各還本
官天下百姓今年夏稅每貫放一百五十文州縣應
徵科兩稅推酒錢內舊額須納見錢數者並任百姓
隨所有段疋斛斗依嘗處時價送納不得邀索見錢
度支鹽鐵戶部應納稅茶兼糶鹽中須納見錢者亦
與時估段疋及斛斗如情願納見錢亦任穩便任求
爲嘗其公私便換錢物先已禁斷宜委京兆府切

加覺察應度支鹽鐵戶部三司官吏所繇欠負元和
十三年已前諸色錢物斛斗委本司盡底勘責如是
入已隱欺卽准條處分如緣欠折攤徵元保外可納
者宜並與疎理諸軍使亦准此處分兩稅外不得別
有差率刺史如違越觀察使舉奏觀察使事乖格勅
刺史不得輒受中使及郎官御史奉使所在並不得
與人事物諸道諸州縣宜委中書門下及觀察使刺
史量開劇刑便可併省者事宜聞奏河北諸道管內
宜各委本道團定兩稅務令均濟河北州縣凋殘戶
口未復其官各據郡邑大小量公事留置餘並停應

諸道管內百姓或因水旱兵荒流離死絕見在桑產如無近親承佃委本道觀察使於官健中取無莊園有人丁者處多少給付便與公驗任充永業不得令有力職掌人妄爲請射其官健仍借種糧放三年租稅推酒有以分配百姓處又置酒店官酤并諸色推率切宜禁斷亡官失爵放還流人有田莊不經沒官被人請射本官及子孫到並委却還天下諸色人中有精通一經堪爲師法者委國子祭酒訪擇其有課績特殊堪在朝獎者臺省官有關宜先選權自今郡守格奉詔條清潔可紀四考與轉諸道或閉糴禁錢

自爲條約切宜禁斷其內外文武及致仕官三品已上賜爵一級四品已下各加一階陪位白身人賜勳兩轉故尚父子儀汾陽王贈太師晟贈太尉秀實各與一子八品官顏真卿杲卿張巡許遠南霽雲各與一子出身武德已來功臣子孫量加獎用中書門下及節度使帶平章事各與一子八品正員官祖父母及父母並與贈官封父歿母存與邑號已贈已封者更與追贈及邑號禮儀使大禮使度支鹽鐵使京兆尹各與一子出身文武嘗叅官并致仕官及諸道節度觀察經畧等使及神策等諸軍使父見存者量與

致仕官母存者與邑號父母亡與贈官及邑號東都
留守及諸道節度觀察經畧等使神策六軍大將軍
威遠鎮國軍使各與一子出身陝州奉先興元功臣
更賜勳爵有差身歿未經追贈者並與追贈應緣大
禮移仗宿衛御樓立仗將士普恩之外贈爵有差仍
准舊例賜錢物二十萬四千九百六十端疋貫大禮
職掌行事官及留守等更賜勳爵及加階升壇殿行
事官更特加一階應在城內蕃客等賜物有差嘗叅
官及刺史有停替及病假解官及中制未授官委中
書門下量才進擬其有情願授致仕官者亦聽天下

諸色人中有賢良方正能直言極諫博通墳典達於
教化軍謀宏遠堪任將帥政術詳明可以理人者委
有司各舉所知限今年十月到上都天下百姓高年
者賜米及綿綸有差

七月己酉册尊號禮畢御丹鳳樓宣制曰我高祖太
宗化隋爲唐奄宅區夏包舉海內全付子孫其何事
哉彼昏盈而我勤勞也明皇承之能大其業六戎八
蠻罔不貢奉繇是庶尹弛政庶吏弛刑視人不勤視
道不謹燕寇勃起動無藩籬六十有七年兵革大試
其何事哉據安逸而易萌漸也逮我聖父勤身振攘

斬斷誅除天下畧定曾是幽冀賜予懷來荷賴景靈
丕訓不墜環歲之內二方平寧粵予何功時帝之力
而卿大夫猥以大號加予眇身讓於四三益甚其請
皇太后始聞其事懼然慰心慈旨下臨臣誠上迨祗
受典禮慄乎予懷尚念昔者七十二君莫不升中慶
成自以爲堯舜莫已若也然而不爲堯舜之行者來
代無傳焉朕常推是爲心不欲名浮於實今卿大夫
謂我爲文武孝德矣其將何道以輔予予其業業兢
兢日慎一日慕陶堯虞舜之行以自勉思文武憲章
之道以自勸予苟不思無忘納誨於戲溢美之名旣

不克讓潤物之澤夫何愛焉可大赦天下自長慶元
年七月十八日昧爽以前罪無輕重咸赦除之唯故
殺人并官典犯賊不在限應左降官及流人未經量
移者宜與量移近處有左降官流人本因犯賊得罪
者宜依今年正月三日制處分京畿諸縣度支鹽鐵
戶部欠負各疎理放免有差經戰陣之處所在州縣
收瘞遺骸仍量事賜與槥殯兼以禮致祭李師道吳
元濟自絕於天並從誅滅念其祖父嘗事先朝墳墓
所在並不得令人擅有毀發愛人本於省賦雖必在
輕國用出於地財又安可闕今淮蔡并山東率三十

餘州約數千里頒賜或踰於鉅萬給復有致於連年
應河南北等州給復限滿處置宜委所在長吏審詳
墾田并桑見定數均輸稅賦兼濟公私每定稅訖具
所增加申奏其諸道定戶宜委觀察使刺史必加審
實務使均平京兆府亦宜准此其百司職田在京畿
諸縣者訪聞本地多被所繇侵隱抑令貧戶佃食蒿
荒百姓流亡半在於此宜委京兆府勘會均配務使
公平其京兆府百姓屬諸軍使者宜令各具挾名勅
下京兆府一戶之內除已屬軍屬使餘父兄弟擬
令式年幾合入色役者並令京兆府明立簿籍並同

百姓一例差遣頻年已有制勅分委京兆府舉舊章
條聞奏刑獄所繫理道最切如聞比來多有稽滯一
拘囹圄動變炎涼自今已後宜令御史臺切加訪察
每季差御史巡囚事涉情故或斷給不當有失政刑
具事繇聞奏其天下州縣並委御史臺并出使郎官
御史兼諸道巡院切加察訪近邊所置和糴皆給實
價如聞頃來積弊頗甚美利盡歸於主掌善價不及
於村閭或虛招以奉於疆家或廣僦用資於游客若
不嚴約弊何可除宜委度支精擇京西北應供軍糧
并和糴院官并營田水陸運使切加訪察仍作條疏

檢轄速具奏聞應停諸道終年勾并不許刺史上使并錄事叅軍不得擅離本州委御史臺切加糾舉內外文武見任并致仕官各賜爵有差神策六軍金吾威遠皇城將士普恩之外各賜勳三轉大長公主長公主嗣王郡主縣主神策六軍金吾威遠皇城等諸軍將士統軍已下并將士等長行立仗及守本軍本營者各賜物有差鴻臚禮賓院應在城內蕃客等並節級賜物陰山貴女來迓天孫會玉明庭克觀盛典念吾妹之將遠於賓禮而宜加其迴鶻公主別有賜物攝侍中讀寶戶部侍郎平章事杜元穎讀冊官中

書侍郎平章事崔樞各加一階誤冊文官與一子正員官奉寶授書玉冊官書寶官各加兩階進寶綬進中嚴外辨禮儀贊導押冊押寶綬昇寶冊官各加一階其餘應職掌行事官并寫制書官太嘗修撰儀注禮官并內定行事中使三品已上賜爵一級四品已上加一階仍並賜勳兩轉鑄造玉冊并填金字造寶裝寶官等各賜物五十段尊師重傅有國嘗經李逢吉韋綬薛放丁公著等普恩之外各加一階如已至三品四品者賜爵一級天下百姓年九十已上委所在長吏量加存問孝子順孫義夫節婦先以旌表者

亦量加優恤五岳四瀆名山大川并自古聖帝明王
忠臣烈士各令所在以禮致祭
二年十二月乙未帝以疾痊平勅在京諸司疎放繫
囚癸丑制曰朕上奉宗祧下臨邦國承烈祖垂鴻之
慶當累聖奕葉之尊祇膺寶圖敬守丕業體明離立
象之重表青宮建嗣之崇元良以貞國本斯固皇太
子濬恭孝溫文生知夙稟日者春闈尚曠東序未興
朕常訓以義方舉明嚴敬匪資調護已達詩書克保
承休爰當主鬯膺茲典禮慶感良深踐位少陽允孚
明命用弘惠澤庶洽兆人自長慶二年十二月二十

日昧爽已前天下應罪合死除犯賊降從流罪已下
遞減一等左降官及流人並與量移亡歿者任歸葬
文武常參官及諸州府長官子爲父後者賜勲兩轉
緣册太子攝太尉稱賀攝侍中承旨宣制進中嚴外
辨攝中書令讀册授册各賜爵一級其行事職掌官
及書寶弘册寶昇舉册寶禮儀使禮官等三品已上
賜爵一級四品已下加一階撰册文官特加一階仍
並賜物有差導引官各加一階鑄造册寶及禮生等
賜勲有差文武嘗參及倍位官并宗子諸親賜勲一
轉景王府官量與進改夫師賢友善庶發清明習近

性遷必資弘道所以慎簡師傅用保元良其太子侍讀宜委中書門下精擇二人具名聞奏

敬宗以長慶四年正月丙子卽位三月壬子御丹鳳樓大赦天下自長慶四年三月二日昧爽已前大辟罪已下罪無輕重嘗赦所不原者咸赦除之左降官縱元勅云終年不齒者亦與收錄諸色得罪人先有勅云縱逢恩赦不在免限並別勅安置者亦放還京畿諸縣應今年夏青苗錢並宜放免秋青苗錢并河南府夏苗錢每貫放二百文其京兆府路所放青苗錢外更放錢五萬貫斛斛五萬石河南府除所放青

苗錢外亦更量放錢三萬貫斛斛三萬石其天下當貢之外更不得別有進獻縱節度觀察使人朝亦不得進奉諸道監軍自今後在本道并入奏並不得進天下所貢奇綾異錦雕文刻鏤一事已上有涉踰制者悉斷至於喪葬嫁娶車馬衣服事關制度不合踰越委中書門下明立科條頒示天下有不守者御史臺及出使郎官御史嚴加訪察節級科處其六宅十宅諸王女宜令每年於選人中擇端良者降嫁老宮人及殘病不堪使役并有父母羸老疾病者並委所司選擇放出鷹犬之類本備蒐狩委所司量留多少

其餘並解放仍勒州府更不得進來官禁經費及乘
輿服膳委所司起今年三分其本色物價及水陸脚
價一半委度支收管一半便任本州收充助貧下戶
闕額稅錢其元和已來兩河節度使全家歸闕者如
張茂昭王承元程權劉聽田弘正等五家在本道日
所有債負并有異於法制之事被人言訴者一切不
得爲理仍各與一子正員官天下州府財物有餘羨
者委觀察使及所管州郡約舊事費用者條件繇中
書門下便差官類例詳定可留可去者聞奏務從寬
濟勿使難守其餘羨錢非兩稅外徵率並不用勘問

自今已後州府所中戶帳及墾田頃畝宜據見徵稅
案爲定後與戶部類會具單數聞奏仍勒五年一定
稅如有逃亡死損州縣須隨事均補亦仰年終申戶
部如有隱漏委御史臺及所巡院察訪聞奏天下兩
稅及諸色雜糧稅等錢弊重輕須有損益亦委中書
門下條疏聞奏諸道除正勅率稅外不得擅有諸色
推稅涉擾人並宜禁斷其軍屯營種有侵占丁田課
役稅戶者宜委御史臺切加訪察仍限勅到一月內
每道各具所還州縣頃畝分折聞奏其諸軍先擒獲
吐蕃生口配在諸處者宜委本道資給放還本國天

下諸州府縣官吏應行鞭撻本罪不致死者假以賊情致令殞斃每念於此良增惻然宜委御史臺及出身郎官御史等切加察訪仍具事繇聞奏天下諸色人中有賢良方正能言直諫經術優深可為人師詳閑吏理達於教化軍謀宏遠堪任邊將者委嘗叅官并諸道節度觀察使諸州刺史各舉所知限來年正月到上都其所在淫祠不合禮經者並委長史禁斷寶曆元年正月辛巳祀吳天上帝於南郊禮畢還御丹鳳樓大赦天下改長慶五年為寶曆元年正月七日琳瑯已前大辟罪已下罪無輕重已發覺未發覺

已結正未結正繫囚見徒當赦所不原者咸赦除之官典犯贓不在此限左降官自長慶四年三月三日制後未量移者並與量移近處已經量移者更與量移嘗叅官及諸州刺史有先因停替及病解假官并制未授官者委中書門下量才進擬諸州先擒獲吐蕃生口配流諸處者委本道資給放還邊上仍不得更受投降人并擒捉生口天下諸色人中能精通一經堪為師法者委國子祭酒訪擇具名以聞天下州縣各委刺史縣令招延儒學明加訓誘大理寺官比來吏部所授多非其才宜令精選有志行詞學兼詳

明法律者注擬其誅績特殊堪任朝獎者臺省有關
宜先選擇如聞去冬吏部所選人駁放者衆或文狀
乖錯或書判差池主司守文不得不爾旣施惠澤亦
在霑恩其長名及雜駁選人如有未離京城者委吏
今月內簡勘除涉踰濫者餘并却收以此遠殘闕注
擬如不情願不可彊之朕卽位之初已有赦令至如
損撤服御止絕他獻限喪葬以息滯費禁竒靡以專
女工他徭擅賦閉糴禁錢吏行姦欺人曷依庇曾道
踰濫流貶重輕錢弊利害軍屯侵占車馬衣服之制
未幾廢格已多或職司惰慢而不能將明或詔書纒

行而已下不守以此求理不亦難乎其元和已來詔
并長慶四年三月三日赦令有委廢不行事在朕躬
者諫官直言得失無有所隱其在臺閣者左右承據
詔條勘舉具事繇聞奏刺史縣令已後無過犯未滿
三周年不得除替如理行尤異但議就加其有才宜
他職灼然章著者中書門下先具事繇及授上年月
奏聽進止

四月癸巳册尊號禮畢大赦天下自寶曆元年四月
二十日昧爽已前大辟罪已下罪無輕重咸赦除之
左降官已經量移者宜與量移近處京百司職田散

在畿內諸縣舊制配地出子歲月已深佃戶致有流亡官曹多領虛數欲令據額均入地盤萬戶供輸百司盡得隨稅出子逐畝平攤比量舊制孰爲允便宜委京兆時與屯田審計會條流聞奏如聞京城諸司捕繫推鞠動經旬時每季御史巡囚罕能舉劾積成寃滯爲弊頗深宜重舉明長慶元年七月十八日赦件聞奏京畿百姓多屬諸軍諸使或戶內一人在軍其父子兄弟皆不受府縣差役項者頗有制勅等分如聞尚未遵行宜委京兆府亦舉明前後條制聞奏內外文武見任及致仕官賜爵加階有差

文宗太和元年正月乙巳御丹鳳樓大赦天下制曰朕聞古先哲王之爲理也修己以安百姓恤刑而矜庶獄端立政以謹始弘厚澤以體仁推其禮以及於物誠於中而化於外和氣斯洽休徵以臻故兵革不試而四海寧疵癘不作而三靈泰我有唐祖武宗文光宅天下列聖承統遂康區中漸濡丕冒掩軼前勳弘茲道以騰英聲煥其文以耀終古惟此鴻業屬予冲人荷無疆之丕構託於兆人之上晝惕宵儆怒焉如疾抑惟宗社儲休神祇協力克靖內難恢復皇綱思希和以立極爰正風於更始因體元紀號之典舉

肆青覃恩之命昭我恤隱與人惟新可大赦天下改寶曆三年爲大和元年正月十三日昧爽已前大辟罪已下罪無輕重已發覺未發覺已結正未結正見繫囚徒嘗赦所不免者減赦除之惟十惡五逆及故殺人官典犯人已贓不在於免限左降官量移近處已經量移其合復資者五品已上中書門下速與處分六品已下任從嘗例選丁憂去任在憂未赴貶所者服闋日亦與量移如有親故在上都任經本司陳狀不必更待州府申請流貶之中縱勅不量許多者及言終身勿齒者亦與例依處分亡官失爵各與收

叙痕累禁錮並從洗滌其緣去年十二月八日坐累流隸者不在此限應緣山陵制度及喪儀禮物宜委中書門下及諸司長官轉詢故實務遵禮度必誠必信副朕哀懷所緣山陵造作及橋道置頓所資並以內庫錢物充用如不足以度支戶部錢充京兆府今年夏稅青苗量放一半太皇太后第二等已上親太皇太后第一等親委中書門下量才叙用九廟子孫陪位者加兩階仍摠始封每王後與一人出身委宗正卿簡尋圖譜取一房最沉翳者充數具名聞奏内外文武官及諸色人任上封事極言得失無

有隱諱天下諸色人中有賢良方正能直言極諫者及經學優深可為師法詳閑吏理達於教化軍謀宏遠堪任將帥者嘗叅官及方牧郡守各舉所知無人舉者亦聽自舉并限來年正月到上都今年正月十四日上皇太后尊號及朕受冊進寶讓卽位冊文承旨宣制等官各與一子正員七品官江王府官去年十二月已前在任者並與改進其去年十二月九日立功將士普恩之外三品已上更賜爵一級四品已下更加一階其赴難軍使兵馬使都虞侯將士等仍各與改轉名銜聞奏

是日立秋兵士南北軍合二萬人翰林學士並升樓侍顧問

六月乙卯詔曰朕聞動人以行不以言應天以實不以文蓋明誠者感通之大本也刑德者陰陽之大倫也故五事陳於洪範時令著於禮經雖堯湯之災或丁於天數而休咎之萌必徵乎人事朕祇荷大統于視兆人宵衣旻食不敢自逸猶慮上心不達於下下志不通於上是以正朝廷聽便殿訪求事之益者罔不行弊之壅者罔不去庶乎交感以致洽和而誠有所未臻應有所未達自春及夏亢陽為害雖麥秋大稔而禾歲未登京畿之間陰陽小爽齋禱備至膏澤未濡中心惻然思所以濟豈庶獄之未孚將一夫之

赦宥九
不獲永用惕戒載懷哀矜其京畿見禁囚徒犯死罪
非故殺人者並降流流已下罪遞減一等依令有司
約禮禱祠宗廟徧祈山川務盡莊敬以副予志百司
庶務有不便於人者各委長吏悉心陳列無使壅於
下聞其實曆二年十二月二十七日勅及今年二月
十二日赦條所釐革施行未畢者宜舉中書門下速
舉處分朕志唯克已誠在恤人自臨御已來躬行不
逮乃者永虞艱食瞻仰昭回幽禱移災蔬食逾月益
罷浮費用嚴天譴尚懼明有未燭道有未宣聞於神
者無馨香施於理者或繆戾終夕三省履冰在懷內

外卿士有規朕以道宜封事條奏宰衡庶尹侯衛守
長各勵乃職庶承於天休

三年十一月甲午有事於南郊禮畢御丹鳳樓大赦
天下四方並不得輒以雜樣難成非常之物爲獻其
於織麗若花絲布繚綾之類並禁斷勅到一月日機
杼一切焚棄刺史分憂得以專達事有違法觀察使
然後舉奏如聞州司常務巨細所裁官吏移攝將士
解補占留支用刑獄等動湏稟奉不得自專雖有政
能無所施設選置長吏將何責成宜委御史嚴加察
訪庶使奏聽進止刑官不能規正及刺史不守朝章

量加貶降若所管州郡控接蕃夷軍戎之間事咨前制卽不在此限
六年正月壬子詔曰朕聞天聽自我人聽天視自我人視朕之菲德涉道未明不能調序四時導迎善氣自去冬已來踰月雨雪寒氣尤甚頗傷和氣念茲庶甦或罹凍餒無所假貸莫能自存中宵載懷旰食與歎怵惕若勵時予之辜思弘惠澤以順時令其天下犯死罪除官吏犯賊及故殺人者餘並降從流流已下遞減一等應京畿諸縣宜以嘗平倉斛計賑恤京城內鰥寡癯殘無告不能自存者委京兆尹是事濟恤具數以聞言念赤子視之如傷天或儆予示此陰沴撫躬夕惕予甚悼焉

七年八月庚寅冊皇太子禮畢制曰帝者承天地貞邦國法明離之象固鴻業之本必命元子以備儲闈斯皇王之令謨古今之丕典祇受春祐虔恭實圖欽若曩章光修聖緒皇太子永幼稟仁智生知孝愛體溫文以立德資敏哲以保躬寬裕有常貞慎無怠爰膺盛禮俾奉青宮嚴宗廟主鬯之儀遵朝夕視膳之節冊命云畢感悅良深問安既慶於寢門布澤宜覃於天下自太和七年八月七日昧爽已前天下應犯死

罪從流流已下遞減一等唯官典犯賊及故殺人劫
獄奪囚持仗強劫者不在此限左降官流人並與量
移如因流貶及諸色得罪人所在亡歿並許歸葬宗
周之盛實在於維城二漢之隆亦繇於磐石自開元
已後累聖子孫皆長於深宮罔知稼穡曾不得習詩
書以修禮樂交氣類以叙人倫雖有間平之才莫施
魯衛之政未言淪廢深疚朕懷諸王等宜以今年已
後相次出閣宜授緊望已上刺史上佐觀其才能續
有叙用人倫所先婚禮爲重笄年許嫁則有明文其
十六宅諸縣主等宜選良偶以時出適仍委吏部乃

於諸色人中選簡令具各闡奏漢代用人皆由儒術
故能風俗深厚教化興行近日苟尚浮華莫修經藝
先聖之道堙蕪不傳况進士之科尤要釐革雖鄉舉
里選不可復行然務實抑華必有良術旣當甚弊思
其改張今寰宇人寧干戈已戢皇太子方從師傅授
五經一二年之後當令齒胄國庠以興隆典宜令國
子監於諸道搜訪名儒置五經博士各一人其公卿
士族子弟明年已後不先入國學習業不在應明經
進士之限其進士舉宜先試帖經并略問大義精通
者次試議論各一道文理高者便與及第其所試賦

並停其式經官便以國子監學官充禮部不得別更
奏請弘文崇文兩館生齋郎並依令式試經畢仍差
都省郎官兩人覆試卿大夫者下人之所視遠方之
所做若非恭儉克己蕪貞化人而望其服從固不可
得况朕不寶珠玉不御織華逮於六宮皆務儉薄卿
大夫得不叶朕此志率先兆人比年所頒制度皆約
國家令式去其甚者稍謂得中而士大夫苟自便身
安於習俗因循未革以至於今百官士族起今年十
月服冬裘已後其衣服輿馬並准太和六年二月十
七日勅處分如故違制度九品已上量加黜責其布

衣五年不得舉選百姓軍人各委州府長吏漸施教
化使自遵行不要便為禁制令其驚擾惠養疲人本
於庶吏阜其生殖在絕貪求其諸道方鎮刺史等有
聚歛貨財潛行餽遺者委御史臺糾察以聞仍委度
支鹽鐵分巡院同為訪察不得容蔽親人之官切在
守長久於其道政乃可成其方鎮刺史三考已下者
不得輒議替換如理有異等委中書門下訪察就加
寵獎如灼然可錄者別與甄升其或政有乖理害及
百姓者卽不在滿三考限易譏豐屋傳美卑宮雕刻
礱磨先賢所戒近者官纔升於郎署位始至於郡符

莫不高其閭閻廣以池榭非唯僭侈踰制實亦耗蠹傷財其百官等宅已造成者並許仍舊今日後如更有創立新宅及屋室高大者並委御史臺糾彈必嚴加黜責御史臺所置六察分糾百司此來因循鮮能舉職起今以後諸司如有身名偽濫隱盜官錢及違法等事他處發覺者監察御史並當貶斥考課之法前王所重蓋以綜覈吏理勵精政途名實苟違將何沮勸宜准故事置內外知考使兼令中書舍人給事中各一人監考百姓困窮弊繇奸吏政苟不擾人皆自安其司農寺宮供內及諸厨冬藏菜並委本寺自

供其菜價仍委京兆府約每年時價支付更不得配京兆府和市其諸陵守當夫宜委京兆府以價直送陵司令自顧召並不得差配百姓應寒食雜差配及樹栽修橋柴木選場棘等便於本戶稅錢內剋折不得更令和市天下諸州府應納義倉及諸色斛斛二合耗外切宜禁斷仍委度支鹽鐵分巡院及出使邸官切加訪察其義倉斛斛先有借用處委戶部勾當並須及時填足文武嘗祭官及諸州府長官子爲父後者賜勳兩轉應緣冊禮行事官賜爵加階加勳并賜物有差皆王府官未經進改者量與進改其皇太

冊府元龜 卷之九十一 帝王部 九十一

子侍讀宜委中書門下精選二人具名開奏天下孝子順孫先旌表門閭者及高年廢疾者委所管州縣各加存恤

冊府元龜

淮南李嗣京參開

西極文翔鳳訂正

豫章黃國琦較釋

帝王部 九十一

赦宥第十

唐文宗太和八年二月庚寅詔曰朕祗若天命繼承睿喆正統紀以清四方序彝倫以貞百度慄慄寅畏于茲九年雖儉已飭躬推誠育物懼有未至不遑晏寧屬節氣交時疾恙嬰體列聖垂祐涉旬復初既上

冊府元龜 帝王部 卷之九十一

慶於兩宮宜覃恩於兆庶思與寰宇同茲福祥自太和八年二月九日昧爽已前天下應犯死罪降徒流已下罪遞減一等唯官典犯賊及諸色所繇破用官物故殺人十惡等罪不在此限左降官流人宜准去年八月九日勅卽與處分爲政之要必在去煩厚下之恩莫先已責應度支戶部鹽鐵積欠錢物或因繫多年資產已盡或本身淪歿展轉攤徵簿書之中虛有名數囹圄之下嘗積滯寃言念於斯所當矜恤其度支戶部鹽鐵應有懸欠委本司具可徵放數條流聞奏不得容留奸濫京諸司使食利錢已納利計五

倍已上者本利竝放其有攤徵保人納利兩倍已上者其本利亦竝放免京邑之內本無推酤屬貞元用兵之後費用稍廣始定店戶等第令其納推况萬戶所聚私釀至多禁令旣不可施推利自無所入從立課額殊非惠人其長安萬年兩縣見徵推酒錢一萬五千一十貫八百文若先欠者竝宜放免其推酒錢起今亦宜停此者滄寇干紀稽誅數年諸道興師竝獻戎捷時方討叛難議釋縛免死戍邊已有恩貸令滄州一道久被朝章念其懷土之心必有向隅之歎俾之遂性用洽優恩其諸道所送滄州將健配流及

邊鎮營田役死者竝委諸道據見在人放歸本管如有已效軍職及自有生業不願去者亦任便住董昌齡自邕州累平溪洞兵威所向首惡皆擒言念蒼生無非赤子况在荒徼尤當撫循其溪洞如有未歸附者向後非因侵擾更不用進討仍加存撫各使懷安所獲黃洞百姓竝分配側近州縣令自營生不得沒為奴婢將充賞給如元是奴婢者即任充賞南海蕃船本以慕化而來固在接以恩仁使其感悅如聞比年長吏多務徵求嗟怨之聲達於殊俗况朕方寶勤儉豈愛遐琛深慮遠邇未安率稅猶重恩宥矜恤以

示綏懷其嶺南福建及揚州蕃客宜委節度觀察使除船脚收市進奉外任其來往自為交通不得重加率稅天下諸州府如有寃滯未申宜委御史臺及出使郎官察訪聞奏朕百靈所祐獲遂痊和虔奉神休敢忘昭報其五岳四瀆天下名山大川委所在長吏致祭仍豐潔以副精誠朕以寡德上承丕構宗社流慶玄穹叶靈微恙懋和旋就康復渥澤思及於人瘼儆戒先自於朕躬俾我華夷共歡富壽中外臣庶宜體予懷

十二月己卯詔曰王者愛人如身推己及物恤其寒

煥之苦適其舒憐之宜俾協太和用臻至理朕恭默
思道憂勤在懷時屬嚴沴念深徽纒當霜雪之候滯
囹圄之中饋餉爲勞逮捕斯擾沍寒所迫愁難必多
惻然疚心思有矜降宣布在寬之令使無留獄之嗟
應京百司及畿內諸縣見禁囚徒應犯死罪特降徒
流流已下者遞減一等如欠官錢情非巨蠹責保填
納不要禁繫唯故殺人者及官典犯賊不在此限仍
委京兆府及諸司官長制下日當速疏決聞奏朕司
牧黎元存誠寰宇况封甸殷廣京師浩擾憫觸法以
罹辜式加恩而宥罪庶亡無告寧失不經宣示中外

令知朕意

九年十二月丁亥詔曰朕以翼翼之心孜孜求理十
年之內庶政未凝極其焦勞志在博採聿觀竒士
冀獲長才取其節焉不顧發迹故李訓鄭瑄咸得進
言望其沃心每許造膝邪人奸色順非而澤信行聽
言深心厚貌包藏不怍僞辨無疑梟獍爲心禍亂竝
作志欲剪除中外悉去大臣志願非常謀安太過上
天垂祐宗社降靈同惡雖多姦謀竟敗忠臣輸力保
護朕躬是日彌寧已嘗布告尚聞閭里未悉予心猶
有浮言謬相誑感朕君臣之際疑間不行致此妖妄

憲非哲惠前月二十一日王涯賈餗舒元興李訓鄭
珽李孝本韓約羅立言王璠郭行餘魏逢等親率金
吾兵仗又郭行餘王璠潛領所部將健持兵上殿叶
謀不軌傾覆社稷謀害中外凡此凶徒悉已梟戮絕
其遺類以謝忠良內外庶臣卿士百辟體予前志宜
卽自安無惑浮言尚相恐怖且布維新之慶宜申在
宥之恩京百司見禁囚徒死罪遞減一等未結正
者推問畢日准此處分諸色所繇官吏陷於脅從雖
有名籍涉於誣誤者一切不用更問仍付左右神策
兩金吾京兆府御史臺並准恩赦處分休便追捕其

有潛藏迴避限令出三日各歸本司逆人親族已處
置外其餘周親已上一切不問所在更不用繫留聞
報其先有定名捕捉者所在尋追獲日奏聞不得漏
網昨者有擅入逆人之家盜掠財物擁無故之利生
怙亂之心尚有縱酒聚徒妖言惑衆志於掠盜恐嚇
居人假託軍司輒持兵器及以前月二十一日事妄
相告訐者委御史臺京兆府嚴加伺察擒捉奏聞所
在集衆決殺不在恩赦之限於戲齊晉之難桓文是
興珽訓之妖朕志先定識邪正之路辨消長之端觀
衆臣宣力於急難見禁旅權兇於頃刻當時危急之

際識臣節之勤藏于予心何日可忘宣示中外宜體朕懷

開成元年正月辛丑朔帝常服御宣正殿受朝賀禮畢大赦天下詔曰朕以寡昧祇奉昌圖兢業爲心不敢自怠庶乎播祖宗之光烈致區宇之康平推誠不疑唯才是用豈謂兇姦背德宗社將危中外叶謀咸加顯戮知人則哲實在帝而猶難罪已興懷誠爲君之不易緬慙古理良用惕然是用因元正御正殿先明首罪仍布鴻恩王守澄累朝獎任久掌禁軍忠力雖多僣誤難掩交通雜累延進奸邪專弄威權蠹害

時政鄭珏李訓因緣引見泰竊恩榮二三舊臣陷在非罪成予憂昧抑有其繇遂使姦惡構連竊起前殿王涯賈餗舒元輿宰輔股肱叶謀不軌王璠郭行餘節將在京率兵上殿羅言立李孝本紀綱臺府深入領徒韓約誘金吾衛兵立成嚮背魏逢驛騎來往鄭珏自出成師將相通謀情狀咸具上天降祐氛侵已清討其本因已正刑辟王守澄旣已云亡難議深責自特進已上官爵及實封並宜削奪禍已終於旣往恩宜覃於有截可大赦天下宜改太和十年爲開成元年正月一日昧爽已前大辟罪已下罪無輕重嘗

赦所不原咸赦除之其左降官量移復資及才用有足稱者中書門下處分貶流大中元勅不許量移及終身勿齒者竝與量移其去年應緣朋黨連累並十一月二十一日坐罪流貶者不在此限其身亡伏誅者委所在州府量給棺殮任所親收葬制服其戶部度支鹽鐵應有諸色欠負太和五年已前者竝放免諸色賀正端午降誕賀冬進奉起今權停三年其錢充紉放百姓兩稅所在除藥物口味茶果外不得輒有進獻百司及諸道應宣索製造一物已上者竝同三年京畿百姓兩稅已下凡一歲之內徵取者并百

官職田竝全放一年其京兆府一年所交用錢物斛斗草等竝勒鹽鐵使以開成元年夏青苗錢同州河中絳州去年旱歉賦歛不登宜放開成元年夏青苗錢同州賜雜穀六萬石河中絳州共賜十萬石委度支戶部以見貯粟帛充賜三省九州列御史臺選黜陟使十人同問風俗進賢退不肖興行新制務令通流天下戎鎮文武帶憲官者解補進退竝須奏聞其逐州令制譯語學官嘗令教習以達異意內外文武官及諸色人任上封事極言得失有裨時政者必加升擢以待不次其有藏器候時隱身岩穴奇節獨行

可激風俗者委嘗參官及所在長吏各以名聞文武之道合而兼濟勲臣子弟有能修詞務學應進士明經及通諸科者委有司先加獎引河朔節將以州縣歸國者有張茂昭田弘正程權各與一子宮子弟堪任使者委中書門下量加引用應內外文武官進階加爵有差

二年三月壬申以妖星見詔曰朕嗣守丕構對越上玄虔恭寅畏於今一紀何嘗不宵衣念道曷食思愆師周文之小心慕易乾之夕惕懼德不類貽列聖羞欲致和平時無災咎然誠未感物譎見於天仰愧三

靈俯慙衆彙思獲攸濟浩無津涯昔宋景發言星因退舍魯僖納諫饑不害人取鑒往賢深惟自勵載軫在予之責宜布恤辜之恩式表殷憂冀答昭戒應在京城百司及天下州府見禁囚徒各委長吏親自鞫問罪合死者從流流已下並釋放唯故殺人及官典犯贓并主掌錢谷之吏計較盜竊者不在免限揚州楚州浙西管內諸郡如聞去年稍旱人懼其災豈可重困黎元更加誅斂爰布蠲除之令用伸拯物之情宜委本道觀察使於兩稅戶內不支濟者量議矜減今年夏稅錢物每貫作分數蠲放分拆速奏仍於供

上及留州使額內相均落下務令蘇息膏澤不愆播種伊始土木興役恐防農功禁中及百司所有修造竝宜權停韶陽御辰生氣方盛思全物類以順天時內外五方凡有籠養鷹鷄及鷄鴨狐兔等悉宜放之起今月一日至五月三十日禁京師畿內採捕禽獸羅網水蟲以遂生成永爲定制委臺府及本軍本司切加禁止唐州晝劫縣官桂州聚集妖人或始於計窮或迷於誘導嘯聚未散伏藏山林者各委本處長吏遣人宣諭恩旨便令放歸鄉貫田里俾安家業勿更相尋所犯如不從制命不在此限朕今素服避殿

命太嘗撤樂大官減膳一日嘗費分爲一旬近者內外臣僚繼獻表章徵引故實請冊尊號夫道大爲皇德大爲帝朕膺此稱祗媿已多矧鍾星變之灾敢議名揚之美非微旣往且儆將來宰臣百僚及諸道節度觀察等使更不用奏請如表已在道路及到者竝宜却還嘗參官及諸州府長吏如有規諫者各上封事極言得失陳救災之本明致理之方咸竭乃心以俾厥辟於戲朕明誠未感化理未孚謹告在天丁寧斯甚所宜盡意與我同憂勉進嘉言共凝庶績弼違納誨副茲虛懷宜示內外各令知悉

三年十一月壬戌以妖星再見詔曰上天益高感應必繇乎人事寰宇雖廣理亂盡繫於君心從古以來必然之義朕嗣膺寶位十有三年當克已以虔恭每推誠於庶衆將以導迎休應漸致雍熙斯克荷於宗祧思保寧於華夏而德有所未至信有所未孚災氣上騰天文譎見再周期月重擾星躔當求衣之時觀垂象之變競懼惕勵若蹈泉谷是用舉成湯之六事念宋景之一言詳求譴咎之端採聽消穰之術必有精理蘊於衆情異屈法以安人爰恤刑而厚下應京城百司及諸道州府十一月八日已前見禁囚徒未

經勅斷者犯死罪竝降從流流已下遞減一等其十惡及謀殺人劫盜賊弁官典犯賊不在此限諸道今年遭水及蝗蟲州縣人戶等宜委觀察使與州縣長吏計會精加察訪勿憚奏論諸道所有進獻時新委中書門下更點勘樽減以稱朕意京畿之內百役繁興欲其阜安切在優恤其今年二月二十五日勅賑貸諸州百姓糧種粟八萬四千九百七十八石如聞數內半是義倉斛此乃救災之備豐年自合收積其餘有戶部管係者竝且停徵以俟來歲畿內諸縣應有關成元年以前諸道逋欠竝宜放免仍委度支

與府司同簡勘聞奏如是官吏破用不在此限皇太子
子塋事十日稍近但令粗及禮制不必過務虛儀似
涉繁冗則須裁減莫無害物夫豈傷恩易定兩州地
理深阻近者守臣喪沒軍中初有異圖累遣詔書申
明事理革心遷善章表繼來張元益出定州後應是
初扶樹元益有違朝旨者自將較至於官健委新節
度使安行慰諭竝經放釋如或輒相告訐却以其罪
罪之莫使藩方永無疑懼文武百寮及諸色人有能
通達刑政之源參考天人之際隨在各上章疏指言
得失乃至撤樂減膳抑亦舊章便當內自指揮不復

更形綸翰宣示中外宜體至懷

四年十一月己亥曲赦京城及畿內死罪降流流已
下者遞減一等唯十惡五逆殺人官典及監臨犯賊
不在此限

武宗以開成五年正月卽位二月戊申大赦天下

會昌元年正月庚戌享圓丘還御丹鳳樓大赦改元

二年四月戊寅受冊尊號大赦

五年正月辛亥有事於南郊禮畢御承天門大赦天

下

六年二月癸酉制䟽理天下囚徒除官典犯賊及持

杖劫人犯十惡外餘罪遞減一等犯輕罪者并釋放京城內仍委宰臣一人與御史中丞同疎理兩京及天下州府耄老憊獨及殘疾窮困交不存濟戶今年夏稅並放免所攻討黨項事不獲已其婦人并幼小未任持兵仗者交兵日不得濫有殺傷

宣宗以會昌六年三月卽位五月大赦

大中元年正月戊申享圓丘還御丹鳳樓大赦改元四年正月大赦天下徒流人比在天德者以十年爲限旣遇明恩例減三載使循環添換邊不闕人次第放歸人無怨苦其秦州源州威州武州諸關等所配

流人須量輕重與立年限宜令止於七年放還如有住者亦聽中有犯死罪及逆人賤隸不在此限諸道府州縣官員如請公假一月已下而權差諸廳判官一月已上卽准勾當例其課料等據數每貫刻二百文與見判按官員添給有故意殺人者雖已傷未死已死更生意欲殺傷偶然得免並同已殺人條處懿宗咸通元年十一月丁未有事於南郊廟禮畢御丹鳳樓大赦改元四年正月庚午有事于圓丘禮畢御丹鳳樓大赦七年十一月壬申以復安南御宣正殿大赦

十二年正月戊申冊尊號禮畢大赦

五月庚申勅慎恤刑獄大易格言曰如得其情則哀矜而勿喜而獄吏苛刻矜在舞文守臣因循罕聞親事以此械繫之輩溢於狴犴逮逋之徒繫於簡牘實傷和氣致用沴氣况時屬炎蒸化先茂育竝赦罪戾式順生成應天下所禁繫罪人十惡五逆故意殺人合造毒藥持杖行劫開發墳墓外餘竝宜疏理釋放或信任人吏多有任情繫留續察訪得知本道觀察使判官州府本曹官必懲譴以誠慢易勅後到十日內速陳理分析聞奏

十四年四月八日迎佛骨入內道場三日後出京城諸寺制曰朕以寡德續承鴻業十有四年頃屬蠻寇猖狂王師未息朕憂勤在內愛育生靈遂乃尊崇釋教志重玄門迎請真身為萬姓祈福今觀觀之衆隘塞路岐載念徃牢寢興在慮嗟我黎人陷於刑辟况漸暑毒繫於縲紲或即幽寃有傷和氣關連追擾有妨農務京畿及天下州府見禁囚徒除十惡五逆故意殺人官典犯贓合造毒藥光火持杖開發墳墓外餘罪輕重節級遞減一等其京城軍鎮限兩日踈理訖聞奏天下州府勅到三日內踈理奏聞

冊元載 赦宥 卷之九十一
僖宗乾符元年十一月有事於郊廟禮畢御丹鳳樓
大赦改元

四年正月丁丑赦天下繫囚及徒流人放還

廣明元年正月乙卯朔御宣政殿制曰朕祗膺寶祚
嗣守宗祧夙夜一心勤勞八載實欲驅黎元於仁壽
致華夏之昇平而國步猶艱羣生寡遂災眚荐起寇
孽仍臻竊弄干戈連攻郡邑雖輸降款未息狂謀江
左海南瘡痍既甚湖湘荆漢耕織屢空言念疲羸良
深軫惻我心未濟天道如何賴近者嚴勅師徒稍聞
勝捷皆列聖之潛祐寧菲德以言功屬節變三陽日

當首歲乃御正殿爰命改元况及發生是宜在宥自
古繼業守文之主握圖御宇之君必自正月吉辰發
號施令所以垂千年之懿範固百代之洪基莫不繇
斯道也可改乾符七年爲乾明元年近日東南州府
頻奏草賊結連本是平人迫於饑饉驅之爲盜情不
願爲委所在長吏子細曉諭如自首歸降保非詐僞
便須撫納不要勘問如未倒戈卽時剪撲東南州府
遭賊之處農桑失業耕種不時就中廣州荆南湖南
盜賊留駐人戶逃亡傷痍最甚自廣明已前諸色稅
賦宜令十分減四其河中府太原府遭賊寇掠處亦

宜准此吏部擢選人粟錯及長名駁放者除身名踰濫欠選考外竝以此遠殘闕收注入仕之門兵部最濫全無根本頗壞紀綱近者武臣多轉入文臣依資除授宜懲僭幸以辨品流自今後武官不得轉入文臣選改所異輪轅各適秩序區分其內司不在此限中和元年七月丁巳帝在蜀御成都府廨大赦改元光啟元年三月丁卯帝自蜀還京已巳御宣政殿大赦改元

五月御殿受冊尊號大赦

文德元年二月壬午帝自鳳翔還京戊子御承天樓

大赦改元

昭宗龍紀元年正月癸巳別御武德殿大赦改元中外文武臣僚進秩頒爵有差

十一月辛卯祀圓丘禮畢御承天門大赦

天順元年正月戊子朔御武德殿受朝賀號禮畢大赦改元

景福元年正月丙午朔御武德殿受朝賀大赦改元乾寧元年正月丁丑朔御武德殿受朝賀大赦改元二年十月丁亥制赦繫囚其節文曰其有任崇柱石位重合衡或委以軍權或參諸宥密竟因連謗終至

禍名鬱我好生嗟乎強死應天順已來有非罪而加
削奪者竝復官資其杜讓能西門重遂李周潼已下
竝與昭雪還其爵秩韋昭度頃處台司每伸相業王
行瑜求尚書令獨能抑之致於沉寃諒繇此事李磈
文章宏贍迥出輩流竟以朋黨之間擠於死地凡在
有識孰不咄嗟宜竝與昭洗仍復官爵

光化元年五月己巳朔以立后大赦

八月己未帝自華州還京甲子御端門大赦改元

天福元年四月甲戌御長樂門大赦改元

三年正月己巳自鳳翔還京謁廟禮畢御長樂樓大

赦

天祐元年閏四月甲辰帝至雒乙巳御光政樓大赦
改元制曰乃睠中州便侯伯會朝之路爰逢百六順
古今禳避之宜况建鼎舊京我家舊宅輶轅通其左
郊鄩引其新周平王之東遷更延姬姓漢光武之定
業克茂劉宗肇葺新都祈天永命皆因否運復啓昌
期或西避於戎狄或載殲於妖孽遭家不造布德弗
明十載已來三罹播越亦屬災纏秦雍叛起邠岐始
幸石門以避衛兵之亂載遷蓮嶽仍驚畿邑之侵憂
危則殆及車輿凌脅則火延官廟迨至遷綿宮豎構

結姦兇致劉季述幽朕於下官韓全誨劫予於右輔
莫匪兵圍內殿燭炬九重皆思假武以容身唯效指
鹿而威衆矯誣天憲欺蔑外藩行書詔以任情欲忠
良而獲罪雖羣方嶽牧協力扶持拘戎律於阻修報
朝恩而隔越獨有副元帥梁王全忠以兼鎮近輔總
兵四藩遠赴岐陽躬迎大駕辛勤百戰盡勦兇渠營
田三年竟迴鑿輅成鎬載新其宮闕讓珪絕類於闕
徒方崇再造之功以正中興之運而又邠延結釁岐
蜀連兵上負國恩下隳鄰好焚宮烈火更延蕪於親
鄰却駕兇鋒復近侵於禁苑抑又太乙游處併集六

言罰星熒惑久躔東井玄象荐災於秦分地形無過
於雒師爰有一二蓋臣洎四方同志竭心王室共誓
嘉謀魏鎮定燕航大河而畢至陳徐潞蔡輦巨軸以
偕來披荆棘而立朝廷剗煨燼而光輪奐左郊兆而
右社稷肅爾崇巖前廣殿而後重廊藹然華邃公卿
僉議邇噬叶從甲子今年孟夏初吉備法駕而離分
陝列百官而幸維郊都此殷繁良多嘉慰謝罪太廟
憂惕驚懷登御端門軫惻興感蓋以一人寡祐而萬
姓靡寧工役艱疲忠良盡瘁克建載遷之業冀延八
百之基宜覃渙汗之恩克俟雍熙之慶滌瑕蕩垢咸

與維新可大赦天下改天福四年爲天祐元年應依天祐元年閏四月十一日昧爽已前所犯罪輕重已發覺未發覺已結正未結正見繫囚徒嘗赦所不原者咸赦除之唯十惡五逆故殺人命造毒藥持杖行劫官典犯賊不在此限長流人罪無輕重一切放免左降官與量移已經量移者更與量移經兩度量移者便與復資縱元勅云逢恩赦不在量移者今亦與洗滌一例施行如所在亡歿者便許歸葬朝貶官前資官及父母喪服闋委中書門下先與叙用存樹勳庸歿留義烈宜錫子孫之澤永流苗裔之恩庶邀英

風以光壯魄武德以來立功效節著在史策兼與樓訪子孫繼嗣量才敘用其近年隨全忠鳳翔迎駕及青州討伐身役王事者委全忠錄奏如未經追贈者與追贈已追贈者更與加贈有子及妻在者優與存恤用表始終土木之工辛勤斯極朴斷旣刊於斤斧結構悉冒於梯登轉石如生剪茨就垣或簡差於軍伍或徵役於他州下不告勞吏皆戮力言念於此先布爾恩應修都邑工匠人夫軍將節級軍人百姓等共賜錢一十萬貫以見在東都諸道上供物充委全忠分給其軍將仍委具名銜聞奏量材酬獎天旋日

轉取象神明雷震電昇蓋資儀衛稱警前導清蹕至
都楯帳赫奕於行宮旂纛披靡於長路建茲班仗整
肅無虧稟教揚威宜膺賞賚應自陝州執掌儀仗隨
駕馬軍及樓下立仗將士等共賜錢五萬貫以見在
東都錢充委全忠分給文修紀律武靜艱氛當于建
國之辰體爾榮家之志大頒蠟印用慰泉扃應內外
文武嘗參官已上及節度觀察防禦刺史竝與追贈
追封先已有者更加封贈務表哀榮漢宗蕭何周師
呂望不有人傑孰極屯危况茲定鼎之方甫爾建侯
之所嘉其勲德一何巍巍迴天再造竭忠守正功臣

守太尉中書令宣武護國宣義天平等軍節度使諸
道兵馬副元帥知府事判六軍諸衛事梁王全忠四
溟偉量五嶽奇姿挺將相之兼才行公侯之全孝迎
鑾岐邑忠貫於神祇作輔鳳池智周於今昔副予愛
予仍董衛兵既久而稱芳見多多而益辨一昨痛
思國難首建良謀追周官卜維之規述殷后遷都之
策故得會盟咸萃遐邇臻分功盡稟於指縱表位
悉歸於心匠躬勤巡撫頻散財糧荷畚鍤以駢羅執
斧斤而翕習千門萬戶化雒宅之新宮三署六軍踰
西京之舊制人謀既叶天祐相扶俾我耿躬享茲垂

拱策勲之典別降麻制處分睠惟良帥活濟疲民果
因富庶之基遂創繕修之事表得人之斯理見有開
而必先叶節元勲賚爾同德東都留守祐國軍節度
使簡較太師兼中書令河南尹張全義保釐泉維二
十餘年惠行而藹若春和令簡而煦猶愛日珪璋特
達桃李無言勸勤靡憚於身先敬善每聞於國事官
商迭應杞梓相扶誅茅棘爲平坦之田變黍離爲垣
墉之峻役均甸服莫不子來夙駕而勤陝宮載星而
營新殿講論勲績實謂亞焉報功之典別降麻制處
分國有大慶先及輔臣僉同旣賴於經綸夙夜頗勤

於扈從道途久次已聞啓沃之言朝闕方新更佇謀
猷之力裴樞等宜與進改別降麻制處分凡營都邑
宗廟爲先非託良臣孰能盡禮魏博節度羅紹威經
文緯武本孝資忠奉三百年之威靈構十二堂之棟
宇將親禘合式魏崇嚴獲展蒸嘗預懷悽感天屬所
蔭百代無踈矧我居新尤宜共樂鎮奠節度使王鎔
代延勲戚躬尚禮儀採嘗嶽之瓌椽製棠華之廣第
內列雍和之殿外開朱戟之扉用弘友愛之風切慰
睦親之思行鑾所駐供億攸難淹留將及於十旬忠
敬備傾其任土陝州節度使朱謙驍得路鵬鸚逢

秋識將臣事君之儀導季父扶天之業仲春迎蹕西
自於閩鄉閩夏撰行東及於都界饋獻有豐於國制
贍濟盡費其家財卓立茂功宜膺異賞竝別降麻制
處分伏念明祖之幸蜀都服闋則恩施父老代祖之
駐陝服迴鑾乃澤布州閭德祖之巡梁州冲人之省
華郡前則以興元列號後則以興德標名矧乃茸棠
抑惟右鎮俾新稱謂用慰藩方宜追列聖之舊文兼
循往年之近事宜改陝州爲興唐府長史爲尹其所
置官屬一准興元等例其將士等仍賜錢三萬貫充
優賞委所司遂便支給其潞州節度使丁會左創文

昌之省右新執憲之臺軍令嚴明興功迅速河陽節
度使張漢瑜宵程來覲兩舍不歸問彼春芳躬巡板
築宮庭馳鞠盖閱驍才王處直遠罄規模備周場殿
則有留陽上相獻嵐谷之瓌材浙右元侯貢夏金之
三品咸鎬緝繕完之政荆襄開水陸之途豫章傾尊
獎之心鄂渚竭忠貞之懇潭桂守弭兵之畧甌閩勤
納貢之儀夏川孤立以安邊朗陵兩州而效悃嶺表
則番禺盡節海濱則青社自新交馳陝渙之途竝集
澗瀍之闕嗟朕菲德何以致茲履薄臨深莫申兢畏
其諸道藩鎮牧守竝委中書門下等其功績進改處

分禮儀使御營使各與進階執政乖方自罹衆怒任使斯久忍忘舊恩故太子少傅崔裔頃者朕在下宮實輸忠節後全忠迎奉又罄裨謀不慎滿盈據投於覆餗今逢曠蕩興念於遺簪宜復本官階爵准天福四年正月十四日已前從別勅處分夫爲下不二爲上不疑適當樹鷄之辰將陳刑馬之誓咨爾藩岳敬聽朕言敦好睦鄰諸侯大義興兵動衆有土深灾居人不保室家戰士身膏草野爲人上者何所忍焉恃安者危逞欲者敗齊桓葵丘之會但整衣裳晉文踐土之盟唯論職貢古賢雖遠仰止何殊如有隣境自

相攻討情理不可容者先具奏聞朝廷爲平其事理若有不用王命擅舉兵者委諸道共伐之含垢匿瑕國君所尚雷驚雨洗域內斯同乾坤盡欲其包容日月不私於炤耀其有負江山之固納奸諂之謀雖恣猖狂或思改革禹謬後至予不忍爲舜用舞干竊所景慕如其執迷不悟長惡不悛國有刑章非朕能捨禍福二事審自擇焉李茂貞楊崇本頃朋閹孽罪已貫盈近抑強鋒謂知大德喘息纔緩翻覆如初嘗懷梟獍之心欲恣豺狼之噬劫脅羣下安忍不臣此而可容是隳王法卽宜經畧進討然念彼一境獨困內

殘罪止二人之身其下竝許立功自贖俟續處分人倫之間天性或異特起因心之孝獨堅匪石之貞方遷國於土中貴廣教於區內應天下有孝子順孫義夫節婦事績彰顯爲衆所知者仰所在長吏標錄聞奏當與旌表門閭將安疲瘵須委循良共理者太守之能親人者縣宰之任戈鋌稍餌政術爲先刺史縣令有勸課農桑招復戶口一倍已上於前者委本道觀察使條件奏聞當加進陟如貪墮不理害及於人者速使停替務加葺養稱朕意焉思拯艱難實資材幹尚慮非嘗之士猶懷自進之嫌苟或失人焉能致

理倘有懷才抱德隱遁山林武藝絕倫湮沉卑賤者仰所在處長吏察訪奏薦如得才實當待以不次之位於戲肆肯閭闔卽安宮闈雖九廟几筵已開於新室而諸侯松栢遙隔於舊都將務又寧難申顧慕文武百辟執事具僚從我千里而來竭爾一心蒞政恩覃既往效責從新方當開國之初必舉慢官之罰分茅邦國外相大官愍茲多難之時無爽勤王之業協告元輔毗予一人礪山帶河敬守漢高之誓卜年與代希同穆滿之言永安新京無忝我高祖太宗之景命赦書日行五百里布告天下咸使聞知

哀帝以天祐元年八月卽位二年四月辛亥制以星
字西北赦京畿之內府縣諸軍諸使及近鎮州應有
見禁囚徒除嘗赦不原者罪無輕重遞減一等限三
日內踈理聞奏畿甸之內應有暴露骸骨委所在長
吏指揮以上供錢收拾埋瘞身没王事者並追贈修
奉園陵役費夫匠車牛宜令錄奏優復一年鄉里耆
耄長吏切加存問搜訪湮沉孝子順孫義夫節婦有
司具以名聞奏必當旌表其鰥寡孤獨不濟者長吏
量加給卹

冊府元龜

冊府元龜

淮南李嗣京參附

西極文翔鳳訂正

豫章黃國琦較釋

帝王部 九十二

赦宥第十一

後唐莊宗同光元年四月己巳卽位於魏州升告禮
畢御應天門改元肆赦制曰法天取象令王以降乘
下民秉籙承乾哲后以膺苗受命莫不運推曆數道
濟艱難經綸於草昧之中式遏於亂略之始君臨兆

庶子惠萬邦壽域將登膏災是宥朕顧慙涼德誠媿前修祗荷鴻休恭修清問將布維新之政是覃革故之思遐按彞章溥頒成憲爰自夙承丕構世奉本朝誓雪耻於君親欲再安於廟社所以躬提義旅力殄凶徒漸致小康永清中夏俄厲列藩羣后不謀同辭咸稱僞逆于天宗祧乏享眷命所屬主鬯攸歸以朕籍係鄭王志存唐室合中興於景祚須再造於洪基推戴既堅讓辭靡獲既難違衆遂命有司乃擇元辰率尊前典尋升壇而奠玉仍卽位以建元欽若舊章敬敷霽澤宜改天祐二十年爲同光二年可大赦天

下自四月二十五日昧爽已前除大辟罪已下罪無輕重已發覺未發覺已結正未結正咸赦除之唯犯十惡五逆火光行劫持刃殺人官典犯賊屠牛鑄錢合造毒藥不在原赦之限鎮州自收復已來累行告諭或因緣危艱爲保家族久在山中寨柵懼罪遲疑或被張文禮脅從事不獲已者昧爽已前一切不問咸從赦宥宜體予懷應六軍及行馬步蕃漢諸道將校兵士等皆以身先冒刃志切勤王或竭節於忠勞或連年而征戍須加恩獎倍撫苦辛其將校尉竝賜功臣名號未有官者卽起一子與簡較官已有官者

亦超一資如官資已高者與加爵邑如曾封爵者卽給一子六品已上正員官其長行兵士並賜功臣多應將士等並勒逐處各定等第優賞應有大勲上將元老重臣或盤維每賴於急難或邦國早資於經濟卽安義令公實昆仲之長護軍特進同骨肉之恩不可以名氏標文不可以臣下同等嘉庸如在崇德未申其次有戰沒陣塲身終王事須顯忠愛之美咸隆贈謚之榮周德威蓋寓李存璋李思恩李嗣本李存進伊廣等兼應該勅文者並委中書門下各令所司一一具錄聞奏各加追贈仍定謚號貴流王澤永飾

泉局應諸道管內有高年踰百歲者便與給優永俾除名自八十至九十者與免一子免役州縣不得差役鄉里有孝子順孫義夫節婦委在所長吏錄其節行具以聞奏盡據典章必行旌表內外文武官及諸色人任封事兼有賢良方正抱器懷能或利害可陳無所隱諱直言極諫將一一行之亦委諸道長吏具姓名申奏或所在有義行頗高爲鄉里所推者並仰准例舉選所司量才任使澤潞封疆兄弟之國進思舊績言念疲民惠在綏懷恩加招撫各仰沿邊鎮戍布命宣陳咸令樂業營生使無侵疆爲患應有奉使

危邦罹殃殊域既遭陷害深可憫傷如伊鐸蓋寓戴漢超李承勳之徒竝仰所司具名錄奏朝廷必議褒贈其貢舉之道誘導爲先切要便行貴申獎士委中書門下速商量聞奏其雲應邊陲北山八軍易定幽燕邊陲諸縣自鮮卑入寇仍歲經災眚彼流人良堪與歎或乍來復業纔擬營農尚怯侵擾須加慰恤其稅率仍委長吏量與矜減凡有逋毒孤貧惇嫠寡歷代皆聞於教化自古共切於軫傷勉致喚咻遍加惠養應有欠負不繫公私若曾重出利累經徵理填還不迨者竝皆釋放夫掩骼著在前經敬神垂於古

典告布諸道州縣所在應有暴露骸骨竝勒逐處理瘞及山林川澤祀典神祇各隨處差官崇修祭享教之爲本禮儀是先德之所崇昭報在上其民間有曾經三世已上不分居者竝與蠲免諸雜差徭倘兵銷患息何須有丹鳳白麟若歲稔人和何必有紫芝赤鴈起今後諸道應有祥瑞竝不要奏聞其赦文中未該詳事節者卽仰所司條件錄奏如敢以赦前事相告者以其罪罪之

十月己丑御崇元殿降德音曰伏順討逆少康所以誅有窮纘業承基光武所以滅新莽咸以中興景命

再造皇猷經綸於草昧之中式遏於亂畧之際朕以
欽承大寶顯荷鴻休雖繼前修固慙涼德此以誓平
元惡期服本朝屬四海之沾危允萬邦之推戴近自
親提組練徑掃氛妖振已墜之皇綱殄偷安之寇孽
國讐方雪帝道爰開拯編昨覆溺之艱救率土倒懸
之苦粵自朱溫構逆友貞嗣凶篡弑二君隳殘九命
虺毒久傷於宇宙狼貪肆噬於華夷剝喪元良凌辱
神主帝里動黍離之歎朝廷多棟撓之危棄德崇姦
窮兵黷武戰士疲勞於力役蒸民旣竭其膏腴言念
於斯軫傷彌切今則已梟逆豎大豁羣情覩曆數之

有歸顯神靈之匪昧得不臨深表志馭朽爲懷將弘
濟於艱難宜特行於肯宥應僞命流貶責受官等已
經量移竝可復資徒流入放歸鄉里京畿及諸道見
禁囚徒大辟罪降從流已下竝赦除之其鄭珪等一
十一人未在移復之限懋德賞功百王明訓疏封列
爵國有通規應扈從征討將較及諸官員職掌軍將
節級馬步兵士及河北諸處屯駐守戍兵士等皆情
堅破敵業茂平讎副予戡定之謀顯爾忠勤之節竝
據等第續議獎酬其有交鋒戰陣沒於王事未經追
贈各與贈官如有子孫成立堪任使者竝量才甄錄

叛之則懲服之則捨蓋前經之與旨爲當代之通規
既屬纂承是務遵守應舊僞庭位居藩翰任處專城
或掌握兵權或捍防邊鄙各爲其主以全其名既解
甲以歸明或飛章而送款變通斯觀忠節可嘉其逐
處節度觀察防禦團練等使及諸州刺史監押及僞
庭先差出行營將校都監等竝頒恩詔不議改更仍
許且稱舊術當候別加新命理國之道莫若安民勸
課之規宜從薄賦庶遂息肩之願異諧鼓腹之謠應
諸道戶口宜竝罷其差役各務營農新係殘欠稅賦
及諸務懸欠積年課利及公私債負等其汴州城內

自收復日已前竝不在徵理之限應天下諸道自壬
午年十二月已前竝放其兵戈蹂躪之地水旱災沴
之鄉苗稼不登徵賦既減應今年經霜旱所損田苗
處檢覆不虛便據畝隴蠲免兼北京及河北先爲妖
稜未平配買征馬如有未請却官本錢及買馬不迨
者可竝放免往哲弘仁有興滅繼絕之道前王惻隱
垂矜孤恤寡之文應有本廟宗屬及內外文武臣僚
被朱溫無辜屠害者竝可追贈之如有子孫及本身
逃難於諸處漂寓者竝所在尋訪津送闕庭當行升
陟其有義夫節婦孝子順孫竝宜旌表門閭量加賑

給或鰥寡孤獨無所告仰者所在各議拯救或有身
過八十者免一子從征殷王以恩推解網竝務好生
帝堯以引過責躬乃思含垢應有先投過僞庭將按
官吏等一切不問事繇無令輒有恐動側席求賢將
臻至理懸旌進善或贊鴻猷應名德有稱才藝可取
或隱居朝市或遁跡林泉竝逐處長吏遍加搜訪津
致赴闕朕當量才任使兼僞庭僭逆已來凡有冤抑
沉滯之人宜竝特與申雪仍加遷陟封遺冢而塋枯
骨義出周王祀名山而祭大川禮傳虞帝既立規於
前古足垂訓於後昆應所在賢士丘墳竝仰聞奏當

議封樹或有暴露骸骨亦委逐處塋埋或有百神一
宇不得有虧時祭應德音內有節文不該者竝仰所
司重具起請分折聞奏當議施行於戲患難以平感
自忠良之力瘡痍未息宜施撫育之恩更在文武元
臣中外耆德覩覆亡而立戒竭忠蓋以爲謀無縱驕
矜須知廉慎同致昇平之道求全開創之功布告遐
邇當體朕懷

二年二月己巳朔有事於南郊禮畢還御五鳳樓宣
制曰體元立極樹司牧者大君創業開基定禍亂者
貞主是以肇分正氣斷鼉足而定四維眇觀玄風抗

龍首而朝萬國兆人歸往率土駿奔同興牧野之師
共赴塗山之會恭行弔伐廣示驅除纔應順於人心
俄恢張於戎畧未踰半歲悉集大功剪窮后於夏郊
擒漸臺於新室配天纂祀寃耻咸申向闕來庭華夷
率服再移星律得事郊禋獲申報本之義已展告虔
之禮顧惟寡薄愧畏尤深久屬僞室克狂彝倫失序
照臨之內愁疾畧同爰當改物之辰乃布維新之慶
與人更始以答天休可大赦天下應同光二年二月
一日昧爽已前大辟罪已下所犯罪無輕重已發覺
未發覺已結正未結正見禁囚徒嘗赦所不原者咸

赦除之十惡五逆屠牛鑄錢故意殺人合造毒藥持
杖行劫官典犯賊不在此限賞不失勞百王令典人
惟求舊有國通規當宜廣示優恩務酬嘉績應自來
立功將較兵士等皆久經戎陣備觀辛勤竝宜各轉
官資仍加賞給應僞朝流人并左降官未經量移者
卽與量移已量移者卽與復資尚慮道路遐遙未盡
知悉中書門下再舉勅文應内外文武嘗參官節度
觀察防禦刺史主軍都指揮使等夙夜在公冰泉斯
戒旣著顯親之道宜嘉事土之誠父母亡歿竝與追
贈追封在者各與加爵增封四品已上扈從翊衛整

肅威儀展我國容俾成大禮應南郊掌儀仗隨駕官員各有勞獎其扈駕樓下立仗將士及河南將較兵士等亦各賜等第優賞賧惟盡瘁言念輸忠率王帛以來庭贊郊廟而貳事既崇丕烈特顯殊恩凡闢竭力之元勳宜舉報功之茂典應藩鎮使臣各賜一子出身仍加功臣名號諸道留後刺史官高者加爵階一級官卑者加官一資宗子維城本支百代禮既行於配祖情敢怠於睦親應本朝皇親近屬因緣僞梁竄遁遐遠竝仰所在搜訪如非謬妄卽與奏聞到京委宗正寺簡勘不虛竝與量才叙錄網羅之中無由

自奮蜂蠆之內竟至無辜旣淪沒於濫刑宜申明於真節凡本朝內外臣僚枉被朱溫殺害者竝仰所司具衙申奏特與追贈仍搜訪子孫量加叙錄事主之道以立節爲先致理之方以賞善爲本其懷才抱器不事僞朝衆所聞知顯有節行仰所在長吏將所著狀具姓名聞奏當別甄獎兼授官秩皇王御宇禮三恪而爲賓士庶敦風賴五聲而濟世當宜封崇後嗣欽若前修應前代二王三恪及文宣王之後竝可各令繼襲仍加恩命所有祖宗廟宇亦宜各與增修其隨處合得俸戶并子孫戶下差稅征徭仍委中門下

較本朝格律施行堯鼓明懸貴聞進諫舜旌旁建比
爲來賢是宜廣納話言庶箴闕政泊僞梁人滋澆薄
朝掩忠良茂聞投水之規莫識從繩之路此後應內
省文武嘗參官弁前資草澤之士有謀分利害事既
機宜竝許上表敷陳朕當選長旌錄如有性多毀譽
私貯愛憎承寬偶恃於得言縱志惟專於罔善朕亦
潛令伺察親要審詳狡蠹有彰罪刑無捨錢者古之
泉布蓋取其流行天下布散人間無積滯則交易通
多貯藏則士農困故西漢興改美之志立告緡之條
所以權畜貴而防大姦也宜令所司散下州府嘗須

簡較不得令富室分外貯見錢又工人銷鑄而爲銅
器蕪公邊州鎮設法鈐轄勿令商人搬載出境被服
錦繡貴賤有倫裁製衣裳短長有度苟無變則必害
女工近年已來婦女服飾異嘗寬博倍費緜帛有力
之家不計卑賤悉衣錦繡念蠶織之匪易顧法制之
不行須示條流異漸遵守委所司散下文榜曉諭御
史臺及諸道觀察糾舉違勅水旱之鄉而饑寒宜恤
兵戈之地勞弊堪傷鄴城及河東久興師旅頗困生
靈其近襄州縣又輦運徭役無時暫息應北京以北
諸州川界及至新州幽州鎮定管界契丹侵掠并邑

凋殘兼遼州沁州南界及安義北界澤州諸縣河陽
向下至鄆濮齊棊已來邊河州縣數年兵革至甚凋
殘自此竝宜倍加撫安召令復業應人戶所輸租稅
特與蠲減已從別勅處分兼諸道州縣有經霜水旱
之災所損田苗納稅不迫懸欠處仰子細簡詳如不
虛妄特與蠲放頃以未殄寇讎勞戰伐况於邊鄙
足見凋傷既歲月滋深在逃逃而可念或主持錢穀
管係牛羊既已罄空須憂徵督將叶來蘇之詠宜施
在宥之恩應近邊界州縣人戶有舊土持官錢斛斛
牛羊諸雜課利送納不迫者竝令蠲放自兵屯郊境

事迫機宜互有侵漁交相虜掠既變良而爲賊實威
脅以勢驅人或銜冤朕寧無慮可各下諸處有百姓
媼女俘虜他處爲婢妾者願歸即竝不得占留一任
骨肉識認其丈夫曾被刺面者仰勘所在村保如委
不係食糧人數便勒本州府各與憑據放逐營生鄉
村糶貨斗斛及賣薪炭等物多被牙人於城外接賤
糶買到房店增價邀求遂使貧困之家嘗買貴物秤
量之際又罔平人宜令府縣及御史臺於諸門嚴切
條流不得更相違犯應天下見使斗斛竝是僞朝所
定宜令所司別造新朝斗秤頒下諸道其見使者納

官毀廢三館蘭臺藏書之府動盈萬卷許列九流爰自
亂離悉多遺逸須行搜訪以備討尋應天下有人能以
經史及百家之言進納者所司立等第酬獎喪葬之
典合式具言使貧者足以備其儀富者不得踰其制
頃自淳風漸散薄俗相承不守等威競爲僭侈生則
不能盡其養沒則廣費飾其終自今後仰所司舉名
條制勿令踰越若故違犯嚴加責罰歷代以來除桑
田正稅外只有茶鹽銅鐵出山澤之利有商稅之名
其餘諸司竝無稅額僞朝已來通言雜稅有形之類
無稅不加爲弊頗深興怨無已今則軍須尚重國力

未充猶且權宜未能全去且檢天下桑田正稅除三
司上供既能無漏則四方雜稅必可盡除仰所司速
簡勘天下州府戶口正額墾田實數待憑條理以息
繁苛國以人爲本人困則國何所依人以食爲天食
艱則人何以濟聞僞朝已來恣爲掊斂至於雜色斛
斛柴草受納倉場邀頡人戶分外誅求納一斛則二
斛未充納一束則三束不了互相蒙蔽上下均分疲
斃生靈莫斯爲甚自今後仰長吏選清強官吏充主
納仍須嚴立條制以防姦欺兼具逐色所納加耗申
奏當官者宜守於朝章力田者宜遵於王制苟容僥

俸必亂規繩訪聞富戶田疇多投權勢影占州縣不
敢科役貧下者更代征徭轉致凋殘最爲蠹弊將安
疲瘵須擇循良應僞庭內班朝僚及諸色主掌職員
等遭無辜殺害者竝許昭雪歸葬共理者太守之官
親人者縣宰之任戈鋌稍弭政術爲先刺史縣令有
勸課農桑招復戶甲增加稅額檢勘不虛委本道觀
察使條件奏聞當加進陟如貪墮不理害及於人者
速便停替務於葺養稱朕意焉况親人之官無先於
令錄致理之道必擇於才能苟選任不自於朝廷則
恩澤全歸於侯伯今日諸道奏請授官人數轉多闕

員全占交曠體例須正條綱委中書門下舉舊例條
理聞奏刺史總一州之政縣令專百里之權至于糾
督之司竝謂親人之任僞朝取士多不擇才蓋自藩
方奏論及因權勢屬託公行賄賂蔑顧典章到官唯
務於追求在任莫思於葺理或聚蓄更希後任或培
歛以報前恩上下相蒙遠邇爲害生靈困斃職此之
繇自此牧守令錄之官委中書門下精加選擇至于
三銓注擬亦在審詳吏能如貪猥有聞不得更授令
錄及到官後委本道觀察使切加鈐轄仍勒本州判
官專爲訪察如掩贓罪不具聞奏豈唯獨罪本官兼

亦累及長吏至於義夫節婦孝子順孫竝合搜揚以
行旌表德音之所未至赦文之所不該凡百有司各
宜申舉於戲園蓋方輿布陰陽而貿萬物賢臣聖主
守紀綱而馭四方所寶者黎元所重者神器久落姦
兇之手每傷忠義之心朕以訓練五兵憂勤三紀收
復而親經百戰輯寧而敢忽萬機得不居安慮危慎
終如始內則委樞衡於元輔庶顯彌綸外則分符印
於列侯務觀製緝股肱惟肅宗社是依朕有過而須
言臣有善而無掩使百姓時序萬國咸寧共全可大
之功式表中興之道

四年正月壬戌制曰蓋聞兵者凶器戰者危事故聖
王不得已而任之是以大兵之後必有凶年朕自收
復汴州戡定蜀郡雖當時秋毫無犯而已前乃十載
勞師每歲傷夷寧無災殃言功於已曾莫繼於百王
語德於人况未洽於兆庶遂至去歲水潦爲災自京
以東幅員千里田疇悉多荒廢人戶未免流亡賦租
旣輸納不充軍食又轉運未及物價騰踊人心前熬
旣視人以如傷每敬天而忘戒朕近欲親幸梁宋徧
恤生靈又恐大駕省方百司云從道途寧免勞擾州
縣復備供承轉慮凋殘莫知攸濟朕自今月三日已

後避正殿減嘗膳徹樂省費以答天譴應同光三年
經水災處有不迨及逃移人戶差科夏秋兩稅及諸
拆配色委長吏切加點檢竝與放免仍一年內不得
雜差遣見在者加意撫恤流徙者設法招攜其田宅
無信有力人戶占射及鄰近毀拆務令歸復以惠傷
殘且念給養兵戎撫綏疲瘵莫連營而粗濟思比屋
以又安危困生靈倍懷憂切近者爰頒御札務切濟
時有所便宜朕無不聽近歲賦稅尚恐懸闕遠年逋
欠豈可督征不惟虛係於簿書兼亦轉困于生聚致其
流散職此之繇應壬午年已前百姓所欠秋夏殘稅

及諸色課利錢物先有勅文悉已放免近聞或不遵守
依前却有徵收仰下租庸司及諸道州府切准前勅
處分如或更有違越任百姓詣闕論訴當議勘窮以
定賊罪其同光元年當戰伐之後是平蕩之初人戶
流離多未復業固於租賦須議矜蠲其諸色殘欠差
稅及不迨係官課利竝與放免分明曉告各遣聞知
又輦轂之中郊甸之內時物踊貴人戶饑窮訪聞自
陝以西遐及邠鳳積年時熟百穀價和縱未能別備
於貢輸亦宜廣通於糶糴近聞輒有稅率已曾降敕
指揮尚慮闕鎮阻滯行人增長物價仰所在長吏切

加檢勘以濟往來推救災卹患之心明奉國憂人之道又京圻之內自全義制置已數十年每聞開懇荒蕪勸課稼穡曾無歉歲甚有餘糧公私貯蓄極多收藏未嘗出糶欲俟厚價頗失衆情宜令中書門下條流應在京及諸縣有停貯斛斗宜減價出糶以濟公私如不遵行卽仰聞奏別具檢括仍委河南府切詳勅命處分代罪弔人旣叶前王之令推恩布澤敢忘當代之憂應三川管內王衍父子僞署將相文武官及諸色職吏等除罪名顯著已從刑憲外脅從者固是無辜同惡者亦以歸命一切釋放更不勘尋仍

不得將今日已前事干有告論貴宣曠蕩之澤以安反側之心我國家奄有四海垂三百年西之日入罔不來賓凡有遐方皆我赤子久陷僭僞寧無憫嗟應三蜀管內百姓除秋夏兩稅及三司舊額錢物斛斗并繼岌崇韜申奏減落徵收外所有無名配率急徵橫歛毒害生靈者更委本道新除節度使上後於館內一一檢勘細具聞奏當與放免俾惠傷殘應在京及天下州府凡有繫囚除十惡五逆官典犯賊屠牛鑄錢光火劫舍持刃殺人准律嘗赦不原外合抵極刑者遞減一等竝貸餘生其次罪等悉與減降踈理

釋放不得久有禁繫自同光元年後或有犯罪流人
情非巨蠹者竝許歸還應行營及在京諸軍皆役管
健偶因過犯便至奔逃懷憂懼以離家恐饑寒而在
外事非在已情亦可矜委所在如有此色人切加招
撫或要却歸都幕或願遂便營生盡捨憊尤悉皆聽
許春以生而秋以殺天之道也德以教而刑以威君
之政也朕惟寡薄敢忘憂勤唯將德惠以臨人庶免
灾害之及物既垂天戒未致時雍爰施布澤之文是
表責躬之道中外臣庶遐邇生靈宜體朕懷固有不
敬 是時天下州府相繼奏戶籍流亡及舉家凍餓者
數千帝憂恐減膳徹樂故降此德音蠲除雜賦人

已流殪無所及也

明宗天成元年四月丙午即位甲寅御文明殿受朝
改元肆赦制曰天生蒸民樹之司牧立君臣之位定
治亂之機撫之則為后王虐之則為讎敵以今況古
何代不然先皇帝親總干戈而奄宅區夏功既成而
稍忘戒懼道未濟而不慎驕矜遂致貪吏蔽姦羣小
多辟勳舊無名而被禍忠良飲憤而見危比屋由是
怨咨連營以之愁歎俄成否運遂至橫流朕昔奉武
皇而幼承明訓早承締構備歷艱難敢忘作礪之規
以奉維城之固一昨趙在禮遽從其羣徑入鄴都一

則迫於饑寒從其糧穀一則痛於離折就彼妻孥朕
既事於專征亦冀成於靖亂豈意羣情見迫衆意相
推雖於擾攘之中彌勵扶持之節無柰軍中散卒亂
若焚絲闕下禁兵勢如烈火繇是指河流而南渡誓
軍旅以西馳志欲救於顛危情冀申於忠赤豈謂兵
搖畿甸釁結蕭牆慙赴難以無功徒撫心而掩泣深
誠未達羣議同詞以爲奉廟社之蒸嘗紹宗祖之基
業軍民所繫神器難虛辭避雖至于再三推戴尤形
於迫切竟將寡昧獲奉宗祧御朽索而敢載馳涉火
川而莫知往夙夜戒懼罔敢底寧所賴中外蓋臣弼

予冲耿援今引古爾旣以大寶尊予濟國安民予亦
以忠貞賴爾庶將此道共致治平宜推更始之恩以
布維新之化今以改同光四年爲天成元年鄴都赴
難之際定策功臣宜特恩以彰豐報其扈從將士及
六軍諸衛諸道行營將校等委中書門下次第酬獎
夫人不能自理立君以理之豈可殫天下之賦租爲
宮中之玩好後宮內職量留一百人其餘任歸骨肉
臣守闈掌扇量留三十人教坊音聲量留一百人鷹
犬之事以備蒐狩量留二十人御厨膳夫量留五十
人其餘任從所適內諸司使務有名無實者並從停

廢先皇運關外之量資供維中之戎馬遂致百姓困弊者不勝餽輓之勞今則須爲制置令度支與總管使會定在京兵數據所供饋積貯京師其近畿糧儲可令諸軍就食諸道營田租庸司先專差務使無益勸農起今後竝委州使管係所納農具斛斗據數申省應納夏秋稅糧先有省耗一升起今後只納正數不得別量省耗其輸芻藁亦不得別徵加耗征賦上供國之常典別申進獻懼削生靈今後節度防禦等使除正至端午降誕四節量事達情自於州府圓融不得報科百姓其四節刺史不在貢奉諸州使造麴

如聞省數之外長吏私更加造價錢多入於私門滯麴常存於省數省司及諸府置稅茶場院自湖南至京六七處納稅以致商旅不通及州使置雜稅務交下煩碎宜定合稅物色名目商旅卽許收稅不得邀難百姓諸道監務破脚價極多獲租課極少須有條流以成規制租庸司先將係省錢與人回置所供課利或爛茶弊物積年之後和本乾沒爲弊最深宜令盡底收納以塞倖門已上五件委三司使條理聞奏力學登第承蔭出身或欠文書侵成踰濫先遭沒毀幾至調選無人州縣多是攝官爲弊滋甚宜令銓

別爲起請止除僞濫餘復舊規昨自魏汴至京大將所歷戎馬騰踐麥苗下本州使檢量據所傷殘與蠲地稅自今年四月一日已前竝與放免如已徵入州縣者卽據數納省若取宮中回鑿錢立契取私債未曾納本利者不在限其餘竝不徵理先緣漕運京師租庸司應借私船今旣分兵就食停於漕運其諸河渡私船竝仰却付本主如有滯留許本主論告先朝屢降德音所司不與宣行遲留奏改利在震人赦書所至仰三司諸道丁寧宣布限一月內便須施行不得遺漏條件仍於要路榜壁貴示衆多嗚呼除舊布新

雖更於法制承祧繼世敢怠於纂脩惟上天之匪忱則下民之康定水能利物有載舟覆舟之文古可立身有興邦喪邦之喻敢不日慎一日業業兢兢庶乃三事大夫百辟卿士共修正道以啟遠菑復先皇帝已墜之基副億兆人相推之意冀上天之悔禍廻下土之沉憂雖唐堯之茅茨土階夏禹之惡衣菲食納隍御朽不憚於憂勤履薄臨深無忘於夙夜必能自勵以慰人情惟爾尊獎之誠興復之志有始有卒是所望於羣公無怠無荒莫不移於薄德凡百有司宜體朕懷

是年十一月庚申敕應天下州使繫囚除大辟罪已下委所在長吏速推勘決斷不得旁追證對經過宿食之地除當死刑外並仰釋放無不許徵理天成元年四月一日已前私債所降德音節文仰王京諸道分明宣布於要害道路榜壁不得漏落今則上聞違犯其後來相次條理諸道事件皆關念及生聚布以優恩多因州使倖門淹留敕命或公然隱匿全不施行官吏但習舊風百姓罔知親命宜令徧加告諭二年二月丙申曲赦京城臺府軍巡見繫囚徒十月辛丑詔曰朕聞后來其蘇動必從於人欲天監厥德

靜宣布於國恩近者優恩多因州使倖門淹留敕命或公然隱匿全不施行官吏但言幸浚郊暫離雜邑蓋逢歲稔共樂時康不謂姦官遽彰逆狀爲厲之階旣甚覆宗之禍自貽俾我生靈遘茲紛擾未言軫惻無輟寐興宜覃雨露之恩式表雲雷之澤應汴州城內百姓旣經驚劫須議優饒宜放二年屋稅兼公私債負如是在城廻置錢物及公私質庫除點簡見在外實經兵士散失者不計年月遠近並宜蠲放兼不得輒差配管內戶有因納稅入州便值更變或散失車牛其車牛許本主識認勤王之節雖自勲賢入貢之勞抑繇於使介其有諸道進奉使

或已入汴州陷失土貢宜與收破無勞重有貢輸專人
經劫奪者宜與優給不軌之徒已加顯戮無辜之士當
慰幽寃馬彥超宋景殷等宜與追贈逆人有子及弟姪
者仰竝釋放一切不問輦輅之下姦逆遽興旣難戢於
戈鏃因莫分於玉石昨王師攻下汴州之時剪除兇逆
之際恐其士庶偶陷鋒鏑言念傷殂良多嗟惻宜令石
敬瑭徧加存問兼勸在城殺傷人口奏聞量加給恤衛
主亡軀摧兇致命偶徇脅從之勢終懷忠藎之誠首議
向明理宜行賞昨車駕初到城下之時有將士率先開
門及下城朝見宜令石敬瑭奏聞當與甄酬禁暴戡兵

實由武德安民和衆乃契天心車駕自離維京戒嚴
兵士不配一物不役一夫河流井水此外無取尚恐
州縣以迎駕爲名妄有配率如或察知必不容恕布
澤之命必叶於羣心宥過之文庶臻于至理應天下
諸州府見禁囚徒除十惡五逆殺人光火劫盜合造
毒藥官典犯贓僞行印信屠牛外罪無輕重竝宜釋
放瑕疵可滌旣責其自新稂莠未除必從於去害應
諸道或有人先偶曾爲非及有背役衙官懼罪藏隱
宜令隨處長吏設法招携各勒歸家一切不問諸色
人不得輒有搖動如或自守狂迷尚且結集當令嚴

加捕捉無致遁逃貴靜封隅永安黎庶策名筮士誠切於進身制祿命官義從於責實既懲黷貨宜有代耕應天下州縣官員逐月俸料如聞支給多不及時縱或支遣皆是爛弱斛斛既闕供輸難責庶慎自此隨處官員所破料錢宜逐縣人戶於合送納稅物內計折充支一則免勞於人戶輪納一則便於官僚仍下三司速與計度掄選之道雖在精研調業之勞頗聞艱苦應選人內有過格年深無門參選縱有材器難遂進趨宜令三銓磨勘行止卽與今年冬集判成選人例量材注官如或詐稱不在此限爲政之要切

在無私聽訟之方唯期不濫天下諸州府官員如有善推疑獄及魯雪冤濫兼有異政者當具姓名聞奏別加甄獎敬老之規前王所重養親之道爲子居先應有年八十已上及家長有廢疾者宜免一丁差役俾遂奉養計國之心忠貞爲本承家之法孝友爲先應天下有孝子順孫義夫節婦兄弟繼世義居者隨處長吏聞奏當行旌表嫌疑之釁多起於蒼黃似是之非率難於明辨應去年四月一日諸州府軍變內有誣誤身沒者竝許子孫禮葬頃以兩軍對壘仍廢交鋒亡歿甚多暴露不少宜令滑濮鄆澶衛等州各

據地界內有暴露骸骨竝與埋瘞仍差官致祭其餘諸道州府有暴露者亦委長吏指揮埋瘞夫天灾流行時雨憊亢旣關地分宜減國租今歲岐華登萊自夏稍旱須加軫念以示優恩四州所管百姓宜令長吏切加安卹其所旱損田苗宜令檢行詣實申奏與蠲減稅租仍不得有差徭科配於戲罪已責躬前王之德滌瑕盪穢往世之深仁致逆孽之亂嘗蓋耿冲之寡德誠深惕厲罔敢怠荒旣行逮下之恩當守不移之信更在朝廷卿士藩翰侯王同交奉守之心共致治平之道宣布遐邇適當體朕懷

終

